

Međunarodna Asocijacija BiH 2005.

Konferencija intelektualaca u Ženevi nada za BiH

Sudjeluje i Ešdaun sa svojim nasljednikom • Provedba na izborima 2006.

Međunarodna Asocijacija BiH 2005., čiji je predsjedatelj bivši visoki predstavnik **Wolfgang Petritsch**, uz desetu godišnjicu Dejtonskog sporazuma za listopad ove godine u Ženevi najavljuje konferenciju oko stotinu stručnjaka koji bi razmatrali rješenja za sretniju budućnost BiH.

Kako su nam kazali predsjednik organizacije **Jakob Finci** te izvršni direktor **Christophe Solioz**, na konferenciji bi radilo 12 panela koji pokrivaju kompletan spektar društveno-političkog života, od gradnje države, primjene ustava i ekonomije do naobrazbe, kulture i sigurnosti.

Od 2003. godine Asocijacija BiH 2005. okuplja poznate intele-



Kakva budućnost: Kristof Solioz i Jakob Finci

Foto: D. ČUMUROVIĆ

Uhvatite Karadžića i Mladića prije Srebrenice!

Članovi savjetodavnog odbora organizacije - **Božidar Matić**, Finci i Petritsch - prošlog tjedna su u međunarodnoj novini *International Herald Tribune*, te u *Oslobodjenju* i *Nezavisnim novinama* objavili apel za hapšenjem **Radovana Karadžića** i **Ratka Mladića**, u cilju pritiska da se to dogodi prije ovogodišnje komemoracije zločina u Srebrenici.

“S njima u Hagu politički prostor u BiH bit će znatno drukčiji,” zaključuje Solioz.

ktualce cijelog svijeta koji će uticati na kreiranja javnih politika kroz relevantna istraživanja i debate. Solioz najavljuje da će na jednom od panela sudjelovati aktualni visoki predstavnik **Paddy Ashdown**, ali i njegov nasljednik, čije se ime još ne daje javnosti.

Razumna perspektiva

“Na tom će se panelu govoriti o prijenosu ovlasti unutar međunarodne zajednice. Želimo pružiti novom visokom predstavniku efektna rješenja,” veli on.

Solioz i Finci ističu kako uz pomoć ugledih stručnjaka, od kojih više od pola dolazi iz BiH, žele stvoriti pokret koji će otvoriti vrata za nadu i političku volju da su promjene moguće.

“Stvar je u tome da ideje budu

izvedive i prijedlozi konkretni. Želimo pružiti razumnu perspektivu, a ne utopiju. Jer prave promjene dolaze od javnosti i samih ljudi,” veli Solioz.

“Nemamo moći, ali možemo ponuditi odgovarajuće rješenje koje će odgovarati i ljudim u BiH i izvan nje. Zbog toga je i regionalni aspekt konferencije,” ističe Finci.

Kao primjer navode prijedlog njihove radne grupa za ustavne promjene, koja je početkom prošlog tjedna predstavila platformu za novi ustav republike BiH.

“Sada radimo na tome da ljudi iz ministarstava vanjskih poslova i ministarstava obrane raznih zemalja, iz EU, političkih stranaka dođu na konferenciju i budu potpuno posvećeni provedbi onog što se preporuča kao rješenje. Nakon toga bismo kreirali lo-

bi kako bismo pokrenuli stvari. U novembru 2006. će biti naredni sastanak u Beču, jer jer Austrija zemlja koja će sljedeća predsjedati EU.

I ondje bismo pokušali utjecati na politiku EU u pogledu cijelog Balkana, ne samo BiH,” kaže izvršni direktor, napominjući kako ima naznaka da se raspoloženje mijenja i u Republici Srpskoj.

Kreiranje nove klime

“Mislim da je vrijeme u koje će se konferencija održati vrlo dobro”, ističe Finci. “Dakle, u oktobru 2005, i do narednih izbora 2006. imat ćemo cijelu godinu. Na osnovu prijedloga koji se kreiraju na konferenciji i usaglase između Bosanaca i Hercegovaca i stranaca, prijatelja BiH, biće dovoljno prostora da se kreira nova klima za izbore u oktobru 2006. te da se rezultati konferencije implementiraju kroz izbore.”

“Konferencija nije dio predizborne kampanje bilo koje političke opcije. Ne stojimo ni iza jedne stranke. A sve stranke su dobrodošle. Želimo da ponudimo moguća rješenja neutralne ekspertne grupe koja želi apsolutno dobro ovoj zemlji,” kaže Finci, predsjednik Asocijacije BiH 2005.

A. PRLENDA